



Prüma lectüra preventiv 2017

La suprastanza ha repassà il prüm sböz dal preventiv dal quint d'investiziun e dal quint da success per l'on 2017. Causa cha impustüt il preventiv dal quint d'investiziuns muossa oura ün fich grond manco da finanziaziun, sun divers progets gnüts spostats inavo o strichats cumplettaing. La seguonda lectüra dal preventiv 2017 ha gnü lö in october.

Progettaziun via da god Güstizia

Per pudair cuntinuar cun la progettaziun da detagl da la via da god tanter Güstizia e Zernez es gnüda surdatta l'incumbenza a l'uffizi da god e privel da natüra chantunal. La via dess gnir sanada insembel cun l'interramaint da la lingia da forz'electricca chi vain manà tras da las Ouvras Electricas Engiadina.

Schoglimaint dal Consorzi da scoulas A-Z

Il consorzi da scoulas A – Z (Ardez fin Zernez) es gnü scholt pels 31 lügl 2016. La scoula a Zernez e la scoulina a Lavin sun uossa darcheu integradas e part dal Cumün da Zernez. Üna cunvegna chi d'eira gnüda preparada per reglar divers puncts dal schoglimaint dal consorzi, es gnüda approvada.

Organisaziun dal territori in Buffalora tanter ils duos cumüns da Val Müstair e Zernez

Il territori da Buffalora as rechatta sül terrain cumünal da Val Müstair. Tenor documainta veglia gioda il Cumün da Zernez il usufrüt da quist territori. Ils respunsabels dals duos cumüns s'han abinats in üna cunvegna sur dals puncts principals da la gestiun in Buffalora.

Cumischiuns e delegaziuns cumünalas

Il chanzlist ha surlavurà il register da las cumischiuns e delegaziuns cumünalas e preschantà a la suprastanza üna proposta pels adattamaints. Seguaintas gruppas da lavur pon gnir scholtas causa cha'l proget es fini giò: gruppa da lavur „structuras optimalas da gestiun“, gruppa da lavur „pratcha da meidis“, gruppa da lavur „seguondas abitaziuns“ e gruppa da lavur „Lavin energia“. Las ideas chi d'eiran gnüdas elavuradas da la gruppa da lavur „Lavin energia“ vegnan surdattas a la cumischiun „Zernez Energia 2020“. Causa müdamaints da las structuras han seguaintas delegaziuns pudü gnir scholtas: cussagl consorzial e cussagl da scoula dal consorzi da scoulas A – Z, cussagl circuitual Sur Tasna, la delegaziun illa gestiun forestala Macun ed illa Pro Engiadina Bassa.

Planisaziun da l'infrastructura publica i'l quartier Muglinè

L'incumbenza per planisar l'infrastructura i'l quartier da Muglinè a Zernez es gnüda surdatta al büro d'indschegners Quadri Liun a S-chanf. La documainta per las surdattas da las lavurs dess esser pronta vers prümavaira 2017. Uschè s'es preparà per realisar la nouv'imboccadüra da la via da quartier illa via maistra chi sto gnir realisada sch'ün privat inoltrescha üna dumonda da fabrica per ün proget plü grond.

Sarinera nouva Brail

La lavur per la planisaziun electricca e da manisaziun illa sarinera nouva a Brail es gnüda surdatta al büro d'indschegners Brüniger + Co. AG a Cuoir.